

每週經課朗誦經文(巴克禮漢羅/教羅)2012/11/11

共同經課 - 1

路得記三章一節~五節、四章十三節~十七節

1 伊 ê ta-ke 拿俄米 kā 伊講，我 ê cha-bó-kiáⁿ ah，我 kiám m̄-tiòh kā 你 chhē 一個安身 ê 所在，hō 你享福 mah？
2 你 kap 伊 ê 奴婢做陣 ê Pho-a-su，伊 kiám m̄ 是咱 ê 該親 mah？看 ah，伊今暝簸大麥 tī 五穀場。3 你 tiòh 洗身軀，抹油，換衫，落去到五穀場；總是 m̄-thang hō hit 人認 tiòh 你，thèng 候伊 lim 食明白。4 到伊倒 teh ê 時，你 tiòh chim-chiok 看伊 tó ê 所在，就入去掀伊 ê 腳所 kah-ê，倒 tī-hia；伊 beh kā 你講，你所 tiòh 行 ê。5 伊就講，你所吩咐 ê 我 lóng beh 行伊。13 Tùi án-ni，Pho-a-su 娶路得做 bó；已經 kap 伊同房。耶和華 hō 伊懷孕生一個 kiáⁿ。14 Hiah-ê 婦人人對拿俄米講，耶和華是應該 o-ló ê；因為伊今 á 日無放 sak 你，致到你無至親 ê 人；願 chit-ê gín-ná tī 以色列中得 tiòh 名聲。15 伊 beh 復到你 ê 精英，奉養你 ê 年老；因為生伊 ê，就是你 hit-ê 疼你 ê 新婦，tùi-tī 你比七個 kiáⁿ iáu khah 好 ê。16 拿俄米抱 hit-ê gín-ná，hē tī 伊 ê 胸前，io 伊親像老母。17 厝邊 hiah-ê 婦人人就 kā 伊號名，講，拿俄米有得 tiòh gín-ná lah；就叫伊 ê 名 O-pī-tek；伊是耶西 ê 老父，耶西是大衛 ê 老父。

共同經課 - 2

詩篇一百二十七篇

1 上崎 á ê 詩；所羅門所做 ê。1) 厝宅若 m̄ 是耶和華起造，起造伊 ê 人就空空 tiòh 磨；城池若 m̄ 是耶和華顧守，就顧守 ê 人空空警醒。2 Lín 早早起，oàⁿ-oàⁿ 睏，食勞碌所得 tiòh ê 飯，亦是空空；耶和華所疼 ê 人，伊 beh hō 伊好睏。3 看 ah，kiáⁿ 兒是耶和華所賞賜 ê 產業；懷孕 ê 胎，是伊所 hō 伊 ê 報賞。4 少年 ê 時所生 ê kiáⁿ，親像勇士手中 ê 箭。5 伊 ê 箭袋充滿 ê 人有福氣；In tī 城-門口 kap 對敵講話，的確不致見笑。

共同經課 - 3

希伯來書九章二十四節~二十八節

24 因為基督 m̄ 是入人 ê 手所造 ê 聖所，做真聖所 ê 影像 ê；就是入 tī 真 ê 天，taⁿ 為 tiòh 咱 chiah-ê 顯現 tī 上帝 ê 面前；25 伊亦免用家己 táuh-táuh 獻，親像 hiah-ê 祭司頭，tāk 年用牛、羊 ê 血，入 chiah-ê 聖所；26 若 án-ni，就基督 tùi 創造世間以來，tiòh táuh-táuh 受苦；獨獨 taⁿ tī chiah-ê 世代 ê 路尾，伊一 pái 出現，獻本身做祭，來除去罪。27 Koh 照所註定 ê，人有一 pái 死，以後有審判；28 án-ni，基督已經一 pái tú-tiòh 獻，來擔當 choē-choē 人 ê 罪過，beh 第二 pái，tùi òng 望伊 ê 人出現，來救 in；hit 時出現 kap 罪無干涉。

共同經課 - 4

馬可福音十二章三十八節~四十四節

38 耶穌教示 ê 時 koh 講，Tiòh 持防 hiah-ê 經學士，in ài 穿長衫，四界行，ài tī 街市裡 hō 人請安，39 會堂內坐高位，筵桌裡坐大位；40 in hiau 吞守寡人 ê 家伙，假意長長祈禱。In beh 受罪 koh-khah 重。41 耶穌坐 tī 庫房 ê 對面；眾人 teh 用錢 hiat 落庫房；有 choē-choē 富人用 choē-choē 錢 hiat 落去。42 有一個 sòng-hiong ê 守寡人來 hiat 兩個半釐 ê，就是一釐。43 耶穌就叫伊 ê 學生來 kā in 講，我實在 kā lín 講，Chit-ê sòng-hiong ê 守寡人所 hiat ê 比眾 hiat 落庫房 ê khah choē。44 因為 hiah-ê 眾人是 tùi in 有 chhun ê 來 hiat；但是 chit-ê 婦人人是 tùi tī 伊 ê 無夠，來一盡 hiat 伊所有 ê，就是伊所 oá 靠來活 ê。